



2019-mut Aningaasanut Inatsisissatut siunnersuut

(Aningaasaqarnermut Nunanilu Avannarlerni suleqatigiinnermut Naalakkersuisoq)

(Pingajussaaneerinnineq)

Alloriarneq siulleq.

Matumani aningaasanut inatsisissap suliarinerani Demokraatini kimigiiserpugut politikikkut pingaartitagut piviusunngortinniarlugit.

Matumunnga aningaasanut inatsisissamut akuersinitsigut politikikkut namminiilivinnissamik takorluugaqarnitta qalliannissaanut pingaarutilimmik alloriarpugut. Tamanna pivoq sinneqartooruteqartitsinikkut takutikkatsigu aningaasarsiornikkut politikimi akisussaassuseqarluta, peqataanillu pitsaasunik suliniutinik aamma takutitsigatta. Taakku kingusinnerulaartukkut tikissavakka.

Politikikkut namminiilivinniaratta, politikimi aalajangiisartutut assersuutigalugu ilinniartitaanerup iluani kiisalu inunnik isumaginninnermi taamatullu aningaasarsiornerup iluani suliasagut angisuut suliarisariaqarpagut. Tamatuma saniatigut aamma taama pingaaruteqartigaaq siuariartornissamut atugarissaarnerulernissamullu sinaakkutissanik eqqortunik pilersitsinissarput. Taasakka aningaasanut inatsimmi pitsaasumi tamarmik siunertarineqartariaqarput.

Demokraatini nammineq isumaqarpugut aningaasanut inatsit manna akuerisassassarput saqqummiunneqaqqaartumut naleqqiullugu pitsaanerujussuusoq. Tamatumunnga pissutaavoq Demokraatini kimigiiserutigatsigu aningaasanut inatsit angusaqarluarnissamut tunngavissiisoq. Partiit Naalakkersuisuutitaqartut suliamut atatillugu akuersaarlutik pisimanagerisa manna tikillugu suliaq oqittuutillugulu nuannersuutissimavaat. Taamaattumik pissusissamisoorpoq partiit Naalakkersuisoqatigiinni tunuliaqutaasut annertuumik Demokraatini qutsavigissallugit; Qujanaq - suleqinnissatsinnut qilanaarpugut.

Matumani aningaasanut inatsimmi ilinniartitaanerup qaffassarnissaanut sinaakkuivugut. Siunertaavoq amerlanerit inuussutissarsiuutigiligassaminnut ilinniartalernissaat. Tamanna ilaatigut pissaaq ilinniakkat teknikimik imallit nukittorsarnerisigut, ilinniartitaanerup iluani aporfinnik piaanikkut aamma meeqqerivinni perorsaasutut ilinniarsimasut amerlisarnerisigut.

Matumani aningaasanut inatsimmi timersorneq nukittorsarneqarpoq aamma inunnik isumaginninnerup iluani nammineq piumassutsimik suliaqarneq. Siunertaavoq innuttaasut peqqinnerulernissaat, tamannalu inuiaqatigiit aningaasarsiorneranni angisuumik sunniuteqartussaavoq - soorlu peqqinnissaqarfiup iluani, tassani manna tikillugu immikkoortumi aningaasanik atuineq annertuumik qaffakkiartorsimammat.

Mittarfiliortiternissaq akuereqqammerparput, Ilulissani Nuummilu 2.200 meterinik takissusilinnik mittarfiliortoqartussanngorlugu, kiisalu Qaqortumi 1.500 meterimik takissusilinnik mittarfiliortoqartussanngorlugu. Matumani aningaasanut inatsimmi attaveqaateqarneq suli annermik nukittorsarparput nunap immikkoortuini timmisartunut suluusalinnut amerlanerusunik



mittarfiliortiternissap suliarinerata aallartinneratigut, taamatullu Uummannami, Qaanaami Kangerlussuarmilu umiarsualiviit inaarneqarnissaannut aningaasaliinitsigut.

Matumani aningaasanut inatsimmi namminersorlutik suliffeqarfiutillit siuariartornerunissaat suliaasaqarnerulernissaallu pillugit sinaakkutit pitsaannerusut pilersippagut. Siullermik aalisarnerup ineriartortinnissaa iliuseqarfigaarput aalisarnermut isumalioqatigiisitanik pilersitsinitsigut taamatullu angallammut misissuummut nutaamut aningaasaliinitsigut. Tamatuma saniatigut isumaqatigiissutigaarput unammillersinnaanerusumik ingerlatseqatigiiffiit akileraaruteqartinneqarnissaasa qularnaarnissaa pillugu suliamik aallartitsiniarluta.

Aningaasanut inatsit pillugu isumaqatigiisummi aamma pisortat ingerlatsiviisa inuik qitiutillugu sullissilluarnerulernissaannut pisariillisaaviginissaanullu alloriaqqaarnissaq sinaakkuserneqarpoq. Ukiuni tulluuttuni marlussunni aningaasartuutunik misissuineq suliaringaatsiarneqassaaq, tassani naatsumik oqaatigalugu pineqarluni ingerlatsinermik pitsanngorsaannissaq, angujumallugu kiffartuussinermi pitsanngorsaannissanut akissaqarnerulernissaq. Tassani sulisut, allaffissorneq aamma ilinniartitaaneq kiisalu peqqinnissaqarfik taamatullu ulloq unnuarlu angerlarsimaffeqartitsineq sammineqassapput.

Taamatut oqaaseqarlunga nalunaarutigissavara Demokraatini 2019-mut Aningaasanut Inatsisissaq tapersorsoratsigu.